

26/06/1998

Kos buruh murah bukan kelebihan

Faizal Fadzil; Abdul Halim Yusoff

KUALA LUMPUR, Khamis - Negara anggota Kerjasama Ekonomi Asia Pasifik (Apec) yang lebih maju tidak harus menganggap kos buruh lebih rendah di negara membangun atau kurang maju sebagai satu kelebihan yang tidak adil.

Datuk Seri Dr Mahathir Mohamad berkata, dalam persaingan antara Industri Kecil dan Sederhana (IKS) negara-negara membangun dengan negara maju, kedua-duanya harus dibenar mengekalkan kelebihan daya saing masing-masing.

"Justeru, kos buruh yang lebih rendah di negara kurang maju tidak harus dianggap sebagai satu kelebihan yang tidak adil. Jika begitu, maka modal serta pengetahuan teknologi dan pengurusan negara maju juga harus dianggap sebagai satu kelebihan yang tidak adil.

"Jika kita sama-sama tidak bersetuju untuk mengekalkan kelebihan daya saing masing-masing, kedua-dua pihak harus mengetepikan kelebihan itu," katanya berucap merasmikan Pameran Industri Kecil dan Sederhana (IKS) 98 dan Hubungan Merentas Sempadan Apec di Pusat Dagangan Dunia Putra (PWTC) di sini, hari ini.

Seminar lima hari itu dianjurkan oleh Perbadanan Pembangunan IKS (Smidec) dengan sokongan Apec. Hadir sama ialah Menteri Perdagangan Antarabangsa dan Industri (Miti), Datuk Seri Rafidah Aziz.

Perdana Menteri berkata, pengalaman menunjukkan apabila kelebihan daya saing seseorang itu digabungkan dengan yang lain, ia akan menghasilkan faedah kos paling besar.

Bagi tempoh jangka panjang, semua orang akan meraih faedah termasuk pengguna di seluruh dunia.

Beliau sehubungan itu, mengulangi gesaan supaya Apec, yang mempunyai sasaran mewujudkan kerjasama ekonomi, harus menerima pakai pendekatan perkongsian bijak yang bermakna semua negara anggota akan meraih faedah.

"Setiap negara harus menyumbang sesuatu, sebagai contoh tanah dan lokasi, buruh, modal, teknologi, pengurusan, bahan mentah dan sebagainya dan hasilnya, setiap orang mesti mendapat hak perkongsian pulangan yang adil.

"Dalam proses itu, pemindahan teknologi dan kemahiran mesti dilaksanakan. Setiap orang harus diperkayakan menerusi hubungan dan pemindahan itu," katanya.

Dr Mahathir menegaskan, Apec mesti memainkan peranan untuk membangunkan hubungan merentas sempadan supaya pasaran negara anggotanya dapat menghasilkan faedah kepada semua.

"Kehendak pasaran bagi produk IKS mesti menjurus ke arah penubuhan industri itu di negara-negara anggota kurang membangun.

"Modal, pengurusan dan teknologi mesti merentas sempadan untuk menyumbang ke arah pembangunan negara-negara kurang membangun menerusi IKS," katanya.

Beliau menyifatkan pameran itu menyediakan ruang ideal bagi mereka yang terbabit untuk bertemu, berbincang dan berkongsi pengalaman dalam membangunkan IKS dalam konteks mewujudkan perkongsian perniagaan secara bestari.

Hubungan itu akan membentuk satu kunci ke arah mengukuhkan hubungan ekonomi sejagat dalam Apec pada alaf akan datang, menjadikan rantau ini sebagai satu lokasi pasaran dunia yang paling berdaya saing.

(END)